



Inatsisartunut ilaasortaq,
Peter P. Olsen, Inuit Ataqtigiit
/Maani

**Ujaqqanik pinnerasaasiassanik nunatsinneersunik
inuussutissarsiuteqarnerup qanoq issusaa pillugu § 37 naapertorlugu
apeqquteqaammut nr. 2018/336-imut akissut 14.01.2019**

Suliap nr. 2015 - 14705
Ulloq: 14/01/19

Postboks 930
3900 Nuuk
Tlf. (+299) 34 68 00
E-mail: asn@nanoq.gl
www.govmin.gl

Asasara Peter P. Olsen.

Inatsisartut Suleriaasianni § 37 naapertorlugu apeqqutit matuma kinguliani allassimasut Naalakkersuisunut saqqummiuppatit, taakkualu matumani akissuteqarfigineqarput.

1 Pinnerasaataarniarfiit pisisartuusinnaasut, ujaqqat erlinnartut silineqanngitsut poortorneqarsimannngitsut amerlasoorsuannngorlugit pisiariumaneruaat imaluunniit nioqqutissanik eqqussuisuusinnaasut ujaqqanik erlinnartunik suliareriikkanik pisisarnissaminut soqutiginnippat?

Akissut:

Niuerfimmi suliaqartut namminersortut sullitat piumanerusaat pillugit ilisimasaqarnerpaajupput.

Annikitsumik aatsitassarsiornissamut akuersissutinik piginnittut kiisalu korundinik piiaanissamut akuersissummik piginnittut arlallit Naalakkersuisut oqaloqatigaat. Taakkua oqaatigaat sullitat inuussutissarsiutigalugu ingerlatsisut ujaqqat pinnerasaasiassat suliarineqanngitsut aamma silisat ujartortaraat.

2 Ujaqqat erlinnartut amerlasuunngorlugit avammut nioqqutissiarissallugit eqqarsaatigineqarpata tuninnginnerani sileqqaarlugit nioqqutigineqarsinnaappat?

Akissut:

Ujaqqanik pinnerasaasiassanik peqarfiit ataasiakkaat assigiinngitsunik pitsaassusilinnik ujaqqanik pinnerasaasiassanik peqarfiupput. Aatsitassat suussusaanni assigiinngissutsit, ilanngullugu manngernerat aamma pitsaassusaat, silisinissamut, silisinermi atortunut aamma silisartut piginnaasaannut assigiinngitsunik piumasaqaateqarfiupput.

Ujaqqanut pinneraasiassanut suliaqarfiit aalajangersimasut ujaqqanik pinneraasiassanik annertumik annertussusilinnik piiaffiusinnaapput, suliassami ujaqqat pinneraasiassat tamarmik najukkami suliarineqassappata, suliareqqiinissamut silisisussat pisariaqartumik amerlassusillit Kalaallit Nunaanni nassaariniarnerat ajornakusoorsinnaalluni.

Pissutsit matuma siuliani taaneqartut tunngavigalugit Naalakkersuisut naliliipput, ujaqqat pinneraasiassat piiarneqartussatut avammullu nioqqutigineqartussatut eqqarsaatigineqartutut annertussuseqartut suliarineqarnissaat suliaqarnermi pisinnaassanersoq, annertussutsit qanoq annertutigisut aammalu pitsaassutsit suut pineqarnerisut apeqqutaasussaasoq.

3 Kalaallit ujaqqat erlinnartuutaannik pisiniartartuusinnaasunit kissaatigineqartutut, silinermut suliarinninnermullu qaffasissutsinut naleqqersuunneqarsinnaasunik misilittagaqassutsikkut/ilinniagaqarsimassutsikkut qaffasissuseqartutut nalilerneqarsinnaasunik, ujaqqanik erlinnartunik, soorlu korund/rubininik, siliisinnaasunik ullumikkut nunatsinni peqarpa?

Akissut:

Matuma siuliani akissuteqaat innersuussutigalugu, silisisartunut piunasaqaateqarnissamut aatsitassap suussusaa pitsaassusaalu apeqqutaavoq.

Kalaallit Nunaanni silisartoqarpoq assigiinngitsunik piginnaasaqartunik, qaffasissumik pitsaassusilimmik silisinermi suliassanik aalajangersimasunik suliaqarsinnaasunik. Pisuni allani silisinermut piginnaasaqarnerit pioreersut ineriartorteqqinnissaannut periarfissaqarsinnaavoq.

4 Kalaallit korund/rubiniutaat annertunerisut najukkami suliarineqartalissappata, suliniutit sorliit siuarsarneqartariaqarpat?

Akissut:

Aaqqissuussinernik annikitsumik aatsitassarsiornermut suliassaqarfimmi ineriartortitsinermi siuarsaasussanik, ilanngullugu Kalaallit Nunaanni korund-inik suliarinnittarneq, ingerlatsisarnissaq Naalakkersuisut suli kissaatigaat. Aaqqissuussinerni ilaatigut siliseriaatsini pikkorissaanerit siusinnerusukkut ilaatinneqartaput.

Naalakkersuisut tamatuma saniatigut, Kalaallit Nunaanni annikitsumik aatsitassarsiornermi suliaqarnerup ineriartortinneqarnissaanut periarfissanik misissuinissaq siunertaralugu, annikitsumik aatsitassarsiornermissamut akuersissutinik pigisaqartut ingerlaavartumik oqaloqatigisarpaat. Tamatumunnga atatillugu, Nuummi Decembarip ulluisa 5-iani 6-ianilu annikitsumik aatsitassarsiornermut tunngasumik isumasioqatigiittoqarpoq. Kalaallit Nunaanni piffinni allani taamaaliortitsinissaq pilersaarutaavoq.

5 Ujaqqat erlinnartut piiarneqartut tamarmik najukkami suliarineqartarnissaat piunasaqaataasassappat, ujaqqanik erlinnartunik suliniuteqarnerup/pilersaarutip ineriartortinneqarnissaanut aningaasalersueqataasinnaasut soqutiginninnerat millisinneqarsinnaava?

Akissut:


Aatsitassat suussusaasa assigiinngissuteqarnerat, ilanngullugit manngissusaat pitsaassusaallu, silisinermut, silisinermut atortunut, silisisartut misilittagaqarnissaannut piginnaaneqarnissaannullu assigiinngitsunik piunasaqaateqarfiupput. Tamanna aningaasartuutit annertussusaannut imminullu akilersinnaassutsimut pingaaruteqarpoq.

Kalaallit Nunaat qaffasissunik aningaasartuuteqarfiusarnermini aallaaviatigut nunanut appasissumik isertitaqarfiusartunut, assersuutigalugu Indien-imut, unammillersinnaassuseqartussaannilaq. Ujaqqat pinneraasiassat naleqannginnerpaat tassani suliarineqartarput. Ujaqqat nalitunerpaat nunani killerni, soorlu Israel-imi, Belgien-imi, USA-mi aamma Tyskland-imilu, silineqartarput. Nunat taakkua qaffasissumik immikkut piginnaasaqartunik silisisarnermi suliffissuaqarfiupput aammalu misilittagaqartunik silisisartoqalutik.

Taamaattumik ujaqqat pinneraasiassat Kalaallit Nunaanni piiarneqartut tamarmik aamma Kalaallit Nunaanni suliarineqartarnissaannik piunasaqaateqarnek, Kalaallit Nunaanni suliaasaqarfimmut aningaasaliisartut soqutiginnilersinnaanerannik sanngiillisitsisussaasoq naliliisoqarsinnaavoq.

Taamaattoq oqaatigineqassaaq ujaqqat pinneraasiassat aalajangersimasumik suussusillit Kalaallit Nunaanni piiarneqartareermata, tassanilu aamma pitsaasumik pitsaassusilimmik suliarineqartareerlutik.

Inussiarnersumik inuulluaqqusillunga



Erik Jensen